

22 AUG 2002

Mahathir-Kurang upaya (Bergambar)

DR MAHATHIR MAHU MAJIKAN BERI PELUANG KEPADA GOLONGAN KURANG UPAYA

SHAH ALAM, 22 Ogos (Bernama) -- Datuk Seri Dr Mahathir Mohamad hari ini meminta semua pihak terutamanya majikan supaya lebih memahami potensi orang kurang upaya dan bersedia membuka ruang kepada golongan itu untuk bekerja di syarikat masing-masing.

Perdana Menteri berkata apa yang penting ialah pengambilan golongan kurang upaya untuk bekerja janganlah dianggap sekadar memenuhi tanggungjawab sosial semata-mata.

"Bagi orang biasa, mendapat pekerjaan adalah sesuatu yang lumrah tetapi bagi mereka yang kurang upaya, ia merupakan satu anugerah yang amat bermakna," katanya ketika merasmikan Persidangan Ekonomi Orang Kurang Upaya Peringkat Kebangsaan kali pertama di sini.

Dr Mahathir berkata golongan kurang upaya harus diberi peluang untuk menunjukkan potensi mereka sambil dapat menikmati kehidupan lebih bermakna tanpa bergantung harap kepada orang lain.

Secara tidak langsung, kata Dr Mahathir, peluang bekerja akan memberi kesempatan bagi golongan itu mengintegrasikan diri, bergaul dan menjadi sebahagian anggota masyarakat.

Sehingga akhir tahun lepas, sebanyak 4,490 orang kurang upaya berjaya memegang jawatan dalam sektor swasta. Mereka terdiri daripada kurang upaya penglihatan sebanyak 645 orang, kurang upaya pendengaran (1,597), kurang upaya anggota (1,956) dan kurang upaya mental (292).

Dr Mahathir berkata bagi sektor awam pula, sehingga kini kerajaan telah menawarkan pekerjaan kepada 446 orang kurang upaya yang memegang pelbagai jawatan daripada kumpulan sokongan hingga kumpulan profesional.

Selain itu, kata Dr Mahathir, atlet kurang upaya negara juga telah menempa kejayaan pada kejohanan sukan peringkat serantau dan antarabangsa termasuk Sukan Komanwel 2002 di Manchester, England baru-baru ini.

"Kejayaan yang dicapai oleh golongan ini membuktikan bahawa mereka juga boleh bersama-sama dengan golongan normal dalam memberi sumbangan ke arah pembangunan dan kemajuan diri serta negara," katanya.

Menyentuh perkara lain, Dr Mahathir berkata ibu bapa tidak patut merasa malu untuk melaporkan kes-kes kecacatan di kalangan keluarga masing-masing memandangkan satu peratus daripada jumlah penduduk di sesebuah negara memang terdiri daripada golongan kurang upaya.

Dr Mahathir turut meminta supaya lebih banyak badan bukan kerajaan (NGO) bergiat secara aktif di negeri-negeri pantai timur.

Menurutnya kebanyakan NGO berdaftar di Lembah Klang dan negeri-negeri pantai barat sahaja manakala bilangan yang didaftarkan di sebelah pantai timur adalah terhad.

"Bilangan orang kurang upaya di pantai timur adalah terbanyak dan mereka juga perlu disediakan pelbagai peluang, bantuan, rawatan, pemulihan, bimbingan dan latihan," katanya.

Persidangan empat hari yang berakhir esok itu dianjurkan oleh Disability Resource Centre dan Persatuan Kebangsaan Orang Kurang Upaya Malaysia.

-- BERNAMA

MAM RIZ RZS AHH NMO